

本朝分省人物考

人物考卷之三目錄

北直隸永平府

郝郁

韓志

趙勝

張文質

周英

王銳

杜謙

陳恕

周斌

閻籛

周玉

齊章

鄭巳

周璽

才寬

郭鏞

蕭顯

王和

李時

白弘

王珣

李金

霍恩

任惠

附王蕃

李炫

魯鐸

馬永

翟鵬

王道中

王念

廖自顯

詹榮

李充濁

附弟充拙

趙得祿

張世忠

王鑑

厲汝進

韓梅

李涵

周冉

王好學

王好問

盧耿麟

劉復禮

王大用

劉文煥

楊騰

補遺

麴祥

萬信

李采菲

本朝京省人物考卷之三

北直隸永平府

郝郁

郝郁字文盛世家永平之撫寧文盛自幼父知其必貴稍長俾學甫冠有司擇主案牘永樂元年内難肅清之後論守城功授陝西咸寧縣丞未行改光祿寺典簿持躬勤慎釐務周悉陞本寺丞益克砥勵時井泉爲光祿寺卿恣無忌畏罔上侮下至於儲君亦肆讒間文盛盡力彌縫靡有遺闕泉旣以罷黜遂超陞光祿卿愈篤弗懈恭事四朝始終一心正統二年以

疾卒訃聞賜祭命有司營葬文盛爲人質直坦易無
城府居家事親孝撫其從弟勝貴壽盡友愛居官處
僚屬和馭下寬平其卒也衆咸悼惜之

韓志

韓志字英氣其先永平之昌黎人考曰文國初編燕
山左衛護後從上靖內難伐北虜樹戰功累官大
寧都司指揮僉事志性剛毅寡言笑馳駿引強衆莫
能逮年甫弱冠以大寧公請老卽拜金吾衛世襲指
揮使時已練達如老成人吏士咸服之永樂中每扈
駕北征宣德元年從宣宗皇帝馳樂安州平庶人

高煦以還三年從大將出塞北生擒一虜五年從征
荅刺安地而一虜馳近營志躍而擒之衆服其英武
正統五年調邳州衛邳當北孔道兵民多窘乏志至
則撫養士卒時以司馬兵法練之簡器械葺城隍使
客過亦善待無忤者令不嚴而肅事不勞而理下皆
畏而愛之遠邇稱譽在朝多知其名十四年虜大舉
入寇京師戒嚴志被薦入衛陞署都指揮僉事提兵
出哨棗林諸處景泰改元從武靖侯駐山西大同府
虜寇北門外志奮先突陣大破走之陞署指揮同知
天順改元加陞中軍都督府都督僉事五年逆賊曹

欽犯闕志與諸將相犄角平之陞本府都督同知掌
五軍營之大營忠慎勤勞英宗大嘉之時命帶刀
侍衛寵遇日加賞賜蟒衣玉帶鳳翅盔明甲寶刀皆
異數也八年疏請致仕上允之志乃歸老邳衛日
居別業事農圃賢士大夫過之必命酒雅歌投壺以
爲樂歷二十餘年而考終吊而哭者填巷塞門里人
至今感焉

趙勝

趙勝字克功系出漢充國之裔世居河朔至伯父赤
考再興國初始徙家永平之遷安遂占籍焉靖難師

興赤以謀略從征有功授永平衛百戶沒于戰陣無嗣再興襲陞千戶永樂庚寅北征大破虜酋本牙失里殺敗阿魯台餘衆陞指揮僉事洪熙改元復以征虜功陞指揮使尋卒勝襲秩甫髫鬣賴母王夫人矢節育教底于成立勝尅志勵行事母極孝敬始終無違禮正統己巳虜寇犯京畿勝率兵出西直門扼其衝突躬履戰陣斬馘無筭虜遂奔遯景泰庚子擢僉都闡英廟復辟錄其舊勞加僉前軍都督府事佩刀侍衛天順戊寅選管三千營操辛巳秋曹孽叛逆勝擒獲功多遷都督同知時虜寇深入陝西固原勝率

師勦敗之 憲宗嗣統命兼鼓勇營典操推恩給進
榮祿大夫成化乙酉重建承天門勝董軍應役既訖
工適山西邊徼有警奉命佩平胡將軍印統軍往援
次雁門關報虜已遁乃還明年秋勝往延綏虜酋聞
風渡河趨大同納款入貢師旋即命典操耀武營戊
子夏建州毛憐海西諸夷弗靖廷議請以勝總鎮之
乃佩征虜前將軍印杖節以征至則申嚴號令簡閱
軍士調度有方屢奏克獲賜勅獎諭辛卯春召回總
典五軍營壬辰春調三千營是夏至甲午秋兩奉制
勅佩印總師北征虜輒遠却丙申總督軍士濬築京

城垣塹兼葺西直門城樓陞後軍都督府左都督戊戌加太子太保癸卯勅封昌寧伯丙午加太保兼太子太傅丁未奉勅董工造墳于天壽山之西南朝夕督視觸冒寒暑邁疾輿歸遂不起贈昌寧侯謚壯敏

張文質

張文質字允中昌黎縣人正統七年舉進士授工科給事中景泰中陞都給事中以音吐鴻臚選爲通政司右叅議天順初進左通政復進通政使成化中加兵部左侍郎工部尚書俱仍掌通政司事旣而加太子少保改禮部尚書管部事歲餘以母喪去服除仍

以禮部尚書掌通政司事後爲言官所劾致仕弘治五年卒賜祭葬如例文質爲人重厚有容居家以孝稱歷官四十餘年無過舉其子忱亦舉進士爲兵部郎中

周英

周英字用傑其先永平遷安人勝國時有官至右丞者祖亨國初率其家百口來歸朝授燕山護衛指揮賜田宅東安縣故爲東安人父斌永樂初以靖難功讓其兄或授都督賜蟒衣復還遷安故又爲遷安人英但教以力田讀書漢庶人有罪英以漢國連姻

註誤與父同下獄父竟死獄中英謫戍萬全開平衛
時都督楊洪以遊擊將軍禦邊英隸其麾下見奇
之委長騎隊未幾虜寇邊令英襲擊出境至瓦房嗟
馳入敵壘得生虜脫脫白及驅其駝馬而還正統三
年復與虜遇連陷其陣擒其酋長明年至黑松林斬
捕甚衆奏功陞副千戶八年擊虜過把禿河獲其酋
那歹九年勅出陝西至應昌別兒克之地與虜鏖戰
一晝夜生擒平章少台斬首四十餘級奪其所掠男
女牛羊五千以歸陞正千戶十二年出開平至以克
蘇遇虜大戰矢下如雨英突入其陣獲虜達刺孩等

男婦檻送京師十四年虜大入寇英宗親率六軍待邊時都督楊洪進昌平伯授節鎮宣府以英隸都督楊能護蹕至大同與虜遇于拷佬山英擒生虜則不丁者以獻命誅禡牙旣又從右叅將江廣擊虜至乾庄兒堡斬首虜猛秃兒麻等還奏捷行在土木失利英身被重創力戰得脫天子北狩京師戒嚴景皇帝以郕王監國徵洪兵勤王英亦褻創赴難至京師洪進爵爲侯因面陳英謀勇可任且賞未當功遂陞指揮僉事後從洪禦紫荆諸關與虜連戰彌月因大敗其衆生擒酋虜阿歸等復斬首百餘級僞太

師也先乃率衆北遁景泰改元陞指揮同知二年錄前乾庄兒等處戰功陞指揮使其年洪卒一軍盡還宣府獨英留京師註府軍前衛英廟復辟陞都指揮僉事五年又以平逆臣曹欽功陞都指揮同知六年英盡以橐鞬戈甲付其子璽而告老以終

王銳

王銳遷安縣人正統己未進士授崇明知縣有政績景泰中陞彰德知府銳長身修髯顧盼有威有權術政治尚嚴察郡中吏民賢不肖及奸邪徭賦獄訟盡皆籍識自聽其政吏亡得爲姦出必鑰關泥之終歲

不得與吏交一言縣吏以賄聞者案之卽令去他事
不中程者笞督令改吏民畏之如神姦人莫敢入郡
地尤留心學校凡朔望謁先師已坐明倫堂聽諸生
說經發疑抉異諸生皆居學宮籌議諸生姓名政少
暇令隸持數籌造明倫堂諸生持籌來自臨試或背
誦書或作義其他出及不衣冠居者受笞當是時黷
序間讀書聲日洋洋盈耳成化五年陞都察院右僉
都御史巡撫延綏值開城土達滿四謀反率兵討平
之論功陞左副都仍巡撫延綏八年致仕

杜謙

杜謙字益之昌黎縣人正統丁卯領順天鄉薦會試
不偶以國子生歷事戶部時山陽金濂爲尚書待下
方嚴獨奇謙欲奏薦爲屬謙力辭之景泰甲戌登進
士 朝廷修寰宇通志遣采事實於山東還授工部
都水司主事督呂梁洪七年改禮部主客司天順庚
辰陞本司署員外郎癸未陞郎中本年以父憂去成
化三年服除改儀制司郎中戊子冊封 晉府充副
使五年 詔廷臣三品以上各舉所知時姚夔在禮
部知謙才可用卽以名上擢浙江布政司右叅議乙
未陞本省右布政丁酉轉左布政使庚子召爲順天

府尹壬寅陞工部左侍郎甲辰漕河淤卽以命謙
方兄嚮用丁未勘事大同還乞致仕年六十九矣還
鄉八年而卒年七十有六謙居官善理事爲工部主
事時在徐州值歲饑區畫荒政作粥食人多所全活
推其餘及牧養孤老男女過時而貧不能嫁娶者皆
出所助呂梁之人至今思之而平生政績尤多在浙
江時平易明決民懷吏畏賓接士人忘其勢分而禮
法之際有所不可雖顯要亦不肯阿從也初各省以
織造上供文綺不如法者獲重譴衆因畏避至積數
年所織造者久而濕蒸多壞工人或破家不能償謙

曰利吾身以害人吾不忍也遂合數郡解運卒亦無
事人始免患嘗清理軍伍有訴於御史得更衛者謙
以爲非例持其文不下御史雖恚不怒也他日定賦
役等第按察使欲增損其則而盡貸無產之家謙以
此輩皆游民而令賦役獨歸於力穡之農非重本抑
末之意卒從謙議歲侵特奏免田租若干舊有起運
存留之數戶部以起運者不可免而止免存留者謙
言若然則一省官俸軍餉俱乏矣二者必增損之乃
可執奏不已 朝廷亦竟從之及在工部適運河淤
塞受 勅修濬因以其屬從行得便宜行事謙盡心

水利不憚勞苦數月舟行無阻公私稱便已而兵部尚書余子俊巡撫大同多用公帑物有誣其侵漁者特受勅偕給事中御史往覈其實或謂謙曰上怒叵測公與余有浙省同僚之舊辭之可免禍謙曰吾知奉公守法而已他何足計頻行又有以危言怵之者亦不顧卒得其實而還余之事竟白其幹濟如此故凡被委命事竣輒受賜賚云居家事親能盡子道父嘗病疽醫莫能療泣禱於天躬吮之良久愈後父年九十猶就養於官以浙地善且迎其兄姊事之人稱其孝友者無間言自少無聲色之奉雖退食

燕居必正襟端坐妻子不敢狎視至接人臨下更溫厚可親是以人皆愛之又待人不以升沉易節在呂梁時商文毅以罪罷遇之尤厚後商入相每汲引之子源亦第進士官至青州知府

陳恕

陳恕字達道灤州人鄉校以德行稱好性理學景泰庚午舉人適歲凶編民輸糧稅于本府恕念偏涼汀地險巇出賓興坊扁銀傭饑民鑿平爲坦途再歲不稔爲專門師以糊口嚴教條不倦諄諄以踐履爲主仕至開封府同知子民下士折獄立斷吏抱牘聽命

不敢近案一語嘗于道中遇數人騶從若貴游者恕
曰此巨盜也邏致之果得其實稱神明河汴屢決請
府發帑羨躬督築塞保全腴田數百頃九年考滿乞
骸骨歸吏民泣送者塞路行李蕭索人不識爲宦者
歸惟乘一蹇驢入城有司重其賢贈銀五兩卽市鐵
鑄文廟祭器積善行義類此

周 斌

周斌字國用昌黎人也景泰辛未進士授御史侃侃
不事細瑣嘗出巡南畿河南陝西右諸藩申理冤獄
摘伏如神 英廟復辟之元石曹輩擁奸乘勢作威

福戕逐善類道路以目莫有敢嬰之者斌爲河南道御史首倡同官張鵬周瑄等具其欺罔萌亂十餘事糾之上震怒逮至便殿俾誦彈章而歷詰之衆皆怖懼伏地不敢出一語斌神色自若手持章疏朗讀不少懾每讀至一事輒正色別白之且誦且對歷陳二凶罪狀明甚至其冒功濫職上愕然曰彼率將士迎駕有功何謂冒論功行賞何謂濫斌曰此輩貪天功當時迎駕止數百人光祿賜酒饌名數具存今陞職乃數千人非冒濫而何上默然悉收各御史下錦衣衛獄降謫有差斌斥知江陰縣時諸御史亦

皆坐貶而斌當利害際批逆鱗以持公道能易人所難而首出之以爲望風承旨者戒蓋其激揚彈劾類如此石曹相繼取敗 上從內閣李賢言令冒功迎駕陞官者自首改正四千餘人而悟御史言不謬也斌外威嚴而內平易下車江陰士民聞其風裁敬憚久之愛戴其愷悌嘗爲歌曰旱爲災知縣禱甘雨來水爲患知縣禱陰雲散天順癸未薦知開封府江陰攀轅泣留不可得其治開封陞陝西叅政去日民如江陰時遮道者萬計治陝奏績成化癸巳陞廣東右布政使蒞事甫閱月卒年五十有七

閻 鼎

閻鼎灤州人景泰間由進士任御史彈劾無所避巡
兩浙禁中官暴橫清鹽鑛奸弊人以閻羅目之著有
直菴集

周 玉

周玉字廷璧世家滁之南湖高祖庇哥在 國朝定
天下初起從大將樹戰功遂占戎籍於永平衛父賢
勇略善戰以功遷至後軍都督府都督僉事充右叅
將分守獨石等城天順戊寅虜寇延綏 上驛召至
京命提兵往援至則日與賊戰多所斬獲已卯正月

哨賊野馬澗接戰四日賊益擁衆迎敵乃挺身直前
爲流矢所中死之事聞贈都督同知特命玉嗣授萬
全都司都指揮同知玉時甫弱冠痛父歿于王事感
激自奮期以報虜居官廉慎自持督理屯田邊庾充
贍甲申少宰文莊葉公巡撫其地首薦玉掌都司事
玉勤于職業剴繁理劇若老于吏事者政譽籍然成
化改元威寧伯王公方以都憲總制諸路兵馬復薦
玉志氣英銳號令嚴明宜任遊擊將軍統領奇兵以
靖地方 上賜璽書命玉具如所請是歲秋延綏有
警玉提兵往援斬獲甚衆癸巳虜寇漫天嶺玉率所

部據之虜衆大敗斬獲甚衆進都指揮使總制諸公
遂建議以爲虜雖挫衄然尚據榆林河套以爲巢穴
非潛兵擣之未肯遠遁時各路將領聞議莫有任者
玉乃奮身與前總兵都督許寧統兵出境直抵紅鹽
池賊巢殺敗賊衆殘虜奔竄渡河而北進後軍都督
府署都督僉事甲午秋宣府西路屢報賊警勅玉往
援八月戰賊馬營齊家溝再戰赤賊袁家墩斬獲甚
衆追賊出境而還乙未奉勅充副總兵官鎮守宣府
丁酉奉勅佩鎮朔將軍印充總兵官鎮守宣府庚子
春堠兵報賊窺伺玉率兵自青邊口出追賊至紅崖

兒復至龍門獅子衝累敗賊衆追奔出境至水磨灣等處乃還以功進陞署都督同知癸卯賊自柴溝堡出沒繼又自大同許家堡出沒玉兩率兵追逐俱獲全勝積二功與實授仍署右都督八月掛征西將軍印移鎮寧夏冬十月殺賊棗兒溝丙午奉勅掛平羌將軍印充總兵官鎮守甘肅明年實授右都督先是迤西土魯番賊嘗於成化初劫哈密王母金印而去至是復殺都督罕慎占據其城朝廷議討之玉請因虜使之還者使齎詔往諭庶或有濟已而果遣使人貢并獻金印城池及所虜人口始知玉所籌上大

悅賜勅曰不勞士馬軍餉而坐收成功由爾本謀也
玉歷鎮三邊勞於計畫雖所至有功兵民賴之然亦
坐是嬰疾日思東歸矣前後六七疏乞解兵柄詞意
懇切上皆不允甲寅疾增劇詔俾回京料理聞命
卽日就道明年正月卒壽五十有七玉器宇凝峻自
偏裨爲大將愛養士卒撫循有恩苟不用命必罰不
貸每遇賊計定而後戰往往克敵制勝功績爲多虜
人至見其旗幟卽驚呼遁走隱然爲邊閫之望者若
千年豈偶然哉

齊章

齊章字應璧別號慎軒世家永平之灣州大父貴從
文皇靖難授燕山左衛試百戶父安累立戰功歷
陞指揮僉事章雖生于將門自少篤志力學與伯兄
文同領天順壬午鄉薦登成化丙戌進士已丑文亦
第甲科官至戶部侍郎人以二難稱之章初授戶科
給事中甲午丁外艱服闋復除本科庚子進左給事
中再進禮科給事轉都給事中壬寅轉鴻臚寺寺丞
尋進少卿弘治庚戌擢太常卿凡郊廟祀典駿奔誠
恪儀文節奏亶極詳明 天子嘉其勞洊膺寶鑑之
賜章在太常寺幾六載寅恭匪懈翊贊國家禮樂之

功居多其在鴻臚傳玉音達下情鏘鏗洪亮凡朝覲會同万方聳聽其在諫垣累抗章論列陳時政得失以激直忤旨下詔獄人或危之章曰君仁臣直吾忍負聖明哉竟從寬貸聞者矐之謂得諫臣體嘗奉使冊秦晉二宗藩禮成餽遺一無所受其謹于操持增重國體始終蓋一致也年僅五十八而卒賜祭葬如例

鄭已

鄭已字克修山海衛人也成童入邑庠儷句輒驚人貧而刻意向學隆冬夜燃柴誦書達旦舉鄉試亞魁

登成化丙戌進士選庶吉士劉文安典教每閱其文輒歎曰山海乃有此子耶改御史會廷推撫臣有弗當已出卽抗章論之語侵當道又累疏指摘撫臣及中貴而權要多忌之矣巡按陝西甘涼諸路災沴連歲邊境繹騷已上匡時圖治等疏大要以安民練兵責在守令將帥而守令將帥之選責在吏兵二部探本則歸重于君身親儒臣以講學延大臣以勤政獎直臣以來諫疊疊數千言極剴切咸斷斷可行得上允遂講賑濟飭邊備陝以西賴之時勲貴出鎮統袴子弟怙勢凌下監司莫敢問已捕而杖之濱死實

勲貴人親弟也乃謀中之謫戍宣府總兵募而敬禮
焉館諸佛宮士從學日衆有黠卒怨總兵奏不道事
累及已繫闕下誣白放歸田里尋復官知者欲薦嚮
用而堅謝不起蓋其亮節勁氣嫉惡如仇讐談世事
弗平輒攘臂憤惋至面詰人罔避故多不耦于時云

周 璽

周璽字廷玉遷安人英之子也成化丙戌英以老謝
事璽代爲指揮使辛卯征北虜以功擢署都指揮僉
事用薦領十二營號令尋統五軍右掖戌戌勅充右
叅將分守陽和庚子與威寧海功進都指揮同知調

大同副總兵辛丑以黑山墩功進都指揮使壬寅以
黑石崖功署都督僉事癸卯虜酋亦思馬因大舉入
寇分兵三千守懷仁賊逼下米莊中軍失利璽還兵
內援夜忽直賊營時賊乘勝勢甚銳璽大呼厲將士
曰今日之事有進無退退則無遺類矣衆爭奮無不
一當百銳弩齊發呼聲震天地賊少却良久又突入
短兵接戰璽臂中流矢令左右拔其鏃督戰益急與
其子鵬及共事數輩斬獲十餘級會遊擊將軍劉寧
兵至合爲一營中軍潰卒多來歸兵勢乃振賊旣退
失律者皆得罪錄璽功進都督僉事甲辰改元充總

兵官鎮代州兼督鴈門三關弘治甲申移鎮陝西庚寅命充總兵官佩征西將軍印鎮寧夏甫一歲議修邊備爲久遠計偶得疾召諸子曰吾生獲佩印分閫分已足無所復望獨未嘗大破醜虜爲朝廷報抱恨死矣瞑目絕忽大呼曰好殺好殺遂瞑年四十有二璽負氣蒞事斬斬尤精騎射知兵習戰近時論邊將者必指屈焉

才寬

才寬字汝栗遷安縣人成化戊戌進士坦闊曠達不較小節喜建功名初任西安知府惠民禮下晝則接

訟牘夜則飲宴遇事裁決如流皆談笑應之正德二年以副都御史巡撫甘肅地方自許襄毅經略哈密以後號稱無事及正德初曹元繼之元黨逆瑾偷處恬逸無復宿謀於是奸孽漸萌寬任情裁決綜理周悉三年改撫陝西行事磊落如治郡時條彙粗立尋遷刑部左侍郎未任復以兵部四年陞工部尚書俱踰季而遷會楊一清忤逆瑾養病命以本官兼副都御史總制陝西三邊軍務抵任慷慨好野戰不拘陣略一切裁決自將值大虜在套率師由興武營擊之斬首數十級徃勝深入忽伏兵起中流矢卒於陣事

聞廕子百戶錦衣衛世襲

郭鏞

郭鏞興州右屯人由成化進士授金華推官刑清民服修通濟橋拜御史按宣大遼東糾劾權貴綽有直聲轉山西副使節省糧耗軍民甚便築修邊牆不憚勞瘁卒於官囊無餘貲

蕭顯

蕭顯字文明號履菴更號海釣以山海衛學生舉順天已卯京闈第二試禮部輒弗利成化壬辰乃得進士第甲午擢兵科給事中有武臣中官怙勢求賞者

顯批奏尾駁其功坐是賈怨弗卹也涿州巫邪術蠱
衆自東方來京城男女爭負土爲築祠宇顯抗章劾
之并禁私剏菴觀等數事言極剴切留不報外間傳
言禍且不測忽召至左順門令中官諭遣之人始知
事後數日詢之則巫已逐矣然權幸人嫉之不置辛
丑遷鎮寧州同知時方作草書手闕朝報付其子趣
治裝仍終數紙乃罷鎮寧非人所居至普定衛居焉
夷俗每獻饋流官納則喜拒則疑且恚至相戕害顯
遜謝理諭皆敬服無敢怨者弘治戊申稍遷同知衢
州府勾稽戎籍取非法刑具悉焚之而所得隱丁甚

衆他如撫筦婺修學舍士民賴之辛亥擢福建按察
司僉事領屯田事勸督交至民相率輸納歲無留逋
又一年以萬壽聖節入賀刑部尚書白公昂欲有
所薦擬親戚有力者亦樂爲之援顯不復顧戀上疏
徑歸歸數日而命下乃治別墅與騷人使客遊衍其
間有乞書千文者秉燭終卷遂得目疾而賦詠不輟
正德丙寅卒續未屬猶憂及時事口占對句課其孫
其至死不語如此壽七十有六顯爲詩清簡有思致
所著海釣集鎮寧行稿歸田稿若干卷其爲書尤沉
著頓挫自成一家卷軸徧天下傳至外國後來者殆

鮮及云

王和

王和遷安人成化戊戌登進士知館陶金壇二縣布
愛舉滯召爲御史巡視鳳陽洗剔夙弊在南道劾戶
部尚書張鳳在北道劾西廠太監汪直并奏革西廠
聲動朝野按察山東冒寒暑平青州劇盜生平廉介
方正不移於時好卒日貧不能歸葬同官陳璧哀金
爲賻焉

李時

李時永平衛人成化中中鄉試父貽產悉讓諸兄獨

養老母知岢嵐州廉平多惠政民俗因財退婚曲爲
解諭完聚吏卒有鰥者捐俸以配之同知漢中府甚
得民心知平涼府持守不渝忤逆瑾改授思州府剛
毅有治行所至畏戴德重鄉評

白弘

白弘字宗大別號松菴其先出元部落有把思台者
以功受王封國初有士願者始受籍永平之昌黎弘
曾祖也祖誠從文皇靖難有功後再以克虜功累
陞永平衛指揮使弘父廷玉襲嘗推總三千營事弘
生器宇英異六歲讀書日記數百言與羣兒戲有一

誤墮溝中者衆奔去弘獨垂繩援焉十三能屬文選
補武學生三應科舉司馬余公子俊保國朱公永臨
試弓馬策略屢優獎之時京營候叅帥者若干人弘
爲之首弘治戊申始開武舉弘舉第二陞署都指揮
同知未幾實授癸丑冬有舉弘久諳軍務者以前官
總理神機營事司馬馬公文升一見稱材且以久滯
爲惜尋遷都指揮同知理軍政兼屯田清軍馬政諸
務庚申歲總漕都憲張公敷華以弘廉勇協望舉總
浙漕弘䟽八事上備朝議多見施行居二年奉勅總
督海道葺城于圯浚濠于淤抑強警惰以御守卒先

是有事於海島者往往招釁而私鹽竈燒疑於烽火
弘悉去之他所施罷皆當利弊又以餘力設師塾以
訓武胄居歲餘海道寧肅正德二年移弘掌湖廣都
司事弘鎮以簡靜南人懷之是歲三法司奉勅流獄
于藩有議死而稱冤者弘得其情正色言之不少畏
却得釋者二百餘人又明年以疾請乃還於浙越三
年江西盜侵衢州鎮巡謂弘練達委以疆事弘竭力
備禦未幾輿疾還卒享年六十有五弘雅好吟咏與
客倡和動成卷帙有松庵集藏于家

王珞

王珣字汝溫永平衛人弘治己未進士選兵科給事中督工 泰陵中使董役者剝削軍士伐近陵山木代薪以規利劾之伏辜故工易完且美糜費之省爲多賜銀幣陞工科左徽州有豪族爭訟數年不決命勘遂得情獄成改御史覈應天諸郡公藏知府某不職懼得罪密通賄卽發其贓私罷歸事傳京師陞刑科都給事中 武廟鋪宮奏省費數千金以濟邊餉陞順天府丞歲荒餓莩載途竭力賑活甚衆陞都察院左僉都御史提督鴈門諸關兼巡撫山西裁宗室驕橫以機要規鹽利者峻拒之合境肅然會虜分

路入寇督兵于寧武關戰禦將官以逗遛失利劾其
罪械繫京師因自劾並三邊撫臣俱左遷尋授浙江
左叅議豪民有匿租數十載躬履畝得數百頃爲公
稅孝豐有作亂者遠近騷然衆議調兵剿之請先往
至卽解散陞河南右叅政分守南陽捕浙川礦賊乃
別脅從若干值盛寒多凍餒死悉活以粥遣之陞左
僉都御史巡撫山東擇有司布各郡審編戶則以均
徭役王師討逆濠道經齊魯籌芻糧供億兵皆無敢
犯者及武宗南幸有司預集夫役數萬候境上疫
作且乏食第令及期無誤悉令散歸活者不可勝計

鎮守指以供御大肆科索屢戒不聽卽正色責之欲
擊以笏乃止陞右副都御史巡撫陝西秦中宗室繁
衍祿每不給爲有司累令多方務積折補其數上下
稱便河湟黠虜欲南下牧馬督固原將士嚴兵禦之
遂遁歸略無所失邊民安堵陞南京大理寺卿擢兵
部右侍郎卒賜祭葬如例

李金

李金遷安人弘治間進士官戶部員外郎時倉儲馬
政多奸弊清稽不少假借有貴戚誣占民田勘實歸
於民孝廟奇之書名殿壁賜寶鑑以旌之知德安府

賑饑節冗有疑獄禱廟夢中神若告之其誣立白有
誣坐其婢殺主母者讞釋之淫祠爲祟杖僧而焚其
廬平劇盜周濂等以神明稱次子涵官至左布政使
清才雅度所至人羨慕之

霍 恩

霍恩字天錫盧龍人也高祖成以靖難功陞燕山前
衛正千戶曾祖旺調茂山祖敬父贊皆世其官弘治
辛酉恩舉于鄉明年登進士第拜山陽知縣丁父憂
起補安邑丁祖母憂起補上蔡縣知縣初閹瑾竊柄
天下詢詢靡寧于是大盜乘之扇衆起亂屬久安備

弛民不識兵賊突崩燒聚屠邑煙燄相接賊乃乘勝
勒降吏多棄城走者恩固武胤知兵乃增陴濬隍繕
甲實庾申令嚴約慎邏謹謀泣而誓師曰今日有死
而已退而訣諸妻妻泣而曰脫城破妾焉死恩曰起
臺衙屋後賊至汝登而望之潰汝則死之已而賊果
一騎來勒降曰大王至矣亟辦牛酒犒恩聞之怒執
而戮之徇于師曰吾不盡磔諸徇奴決不共此一天
賊聞之乃大怒悉衆而圍之恩禦之力竭而潰賊執
之妻見其潰也下臺而縊死恩之被執也詬罵瞋瞪
怒髮上指羣酋愕顧失色氣爲之惛將釋而用之恩

不屈以刀挿諸口脅之叫罵愈厲遂遇害頸斷無血
白氣縷縷若騰龍乃其面猶生也壯矣哉

任惠

附王蕃

任惠灤州人弘治間舉進士爲吏科給事中以彈劾
太監高鳳革爲民尋起已卒矣 世廟登基詔旌爲
忠直諫諍王蕃亦灤州人弘治間舉進士授御史與
惠交劾鳳亦革爲民詔與惠同旌起平涼太守

李炫

李炫遷安人幼而好學冬夏兀坐一室弘治間舉進
士甘肅行太僕寺卿居官忠信好士甘肅歷叛將亂

炫匿民舍中示方略而戢之誣執甚衆炫讞鞫多全
活致政二紀課子耕讀足不至官府

魯鐸

魯鐸撫寧人弘治間由進士官大理評事逆瑾擅權
有黨繫獄欲出之鐸按其罪竟置之法分巡遼海風
節炳著人咸服其公

馬永

馬永遷安人世金吾左衛指揮好讀左氏春秋及兵
法機警善射正德中江彬統宣府兵練西內卽自稱
疾篤不隸彬以叅將守太平虜入塞再創去充總兵

官治三屯盡簡諸軍散遣其老弱聽其農市取其備
值給諸健武者健武卒咸奮習武藝益精當是時漁
陽一軍稱獨雄未幾上至喜峰口馳馬欲出塞永
扣馬諫不可上注視久之顧內侍曰此馬永耶笑
而止朶顏酋把兒孫結諸虜邀官賞不得輒入塞永
迎擊再敗之自是效順保塞嘉靖初大同軍亂殺都
御史張文錦叅將賈鑑朝議且撫永力言不可撫他
日九邊效尤將有河北藩鎮之禍勅永出居庸討
賊以流言而止疏乞宥大禮言官奪總兵寄祿南京
十二年大同軍再亂召至業已撫復還南十四年遼

東軍亂召總兵遼東十八年軍再亂以家兵捕斬軍
遂定陞左都督卒于遼遠人爲罷市哭喪過漁陽漁
陽人亦哭罷市兩鎮皆祠祀焉永爲將善詞虜情先
知所從來及衆寡因勢設伏以故虜往往失利去善
養士卒同甘苦又善知人所獎拔列校皆拔起爲方
鎮云

翟鵬

翟鵬撫寧人正德戊辰登進士抽分務光出守衛輝
卓有異聲上計考天下第一扁於部杜王守開封有
並包之謠巡撫寧夏釐奸革弊著有籌邊錄嘉靖二

十三年虜大入寇鵬時任兵部左侍郎總督宣大等處督兵追剿斬獲晉秩本兵設策生擒逆酋王三奪韃馬器甚衆爲宣大數十年來第一捷竟以過直被逮卒於京 穆宗卽位追卹賜祭葬觀其惟有寸丹懸 帝闕更無尺素達權門之句可以想見爲人

王道中

王道中撫寧人正德間進士授安慶府推官太湖險遠人多匿避徭役有一人至縣者卽令賠納蕩產民苦甚道中親詣其所婉曲曉諭止令輸辦本家民甚稱便楊州知府孫某被劾贓鉅萬道中一勘輒明科

道敬服時宸濠餘黨未盡當事者往往以平民誣作
奸細收捕甚冤道中查有賊仗旗幟者止坐四人餘
數百盡釋之稱神明爲鴻臚卿侍經筵小心如一尹
順天府卒著有黃齋集

王念

王念遷安人副使和之子登正德進士部使爲立坊
念以民貧謝寢之知九江府修復廢毀而民不知勞
念復奏開貢額使知向化居鄉廉靜事母孝以先業
畀兩弟不言公事處喪用家禮士夫化之平居鼓琴
遊詠觴舊游忘倦

廖自顯

廖自顯廬龍衛人家貧力學以廉耻自持登正德進士知潁上賑饑活數萬擢御史巡通倉革中官監收弊按宣大將校科歛冒功者執法釐之嘉靖庚寅疏革鎮守建昌中貴更置將官至今快便附闕者銜甚幾爲所陷知汝寧府以直退著拾燼集放言集憫遺錄

詹榮

詹榮字仁甫號角山其先爲尤溪人洪武間其曾祖旺者以戎籍隸山海衛榮少卽英敏年十二補衛諸

生嘉靖四年舉于鄉明年成進士授戶部廣東司主事權稅河西監兌湖廣皆有廉幹聲晉山西司郎中督餉大同大同帥李瑾者馭士嚴軍中不附屬虜窺塞下瑾令卒浚濠四十里遏虜騎刻日竣工衆譁攻殺瑾守臣以聞詔遣卻永爲帥劉源清督師討之叛卒懼欲誅首亂自贖源清不許趣攻之終不能下乃相與謀城可灌也榮曰雲中重鎮以數十叛卒隳其城非計且鎮人何罪而以爲僂乃與都指揮紀鎮等歛血盟討賊而私察賊黨馬昇楊麟者有才略可用也爲請貸其死畀三十金使自募士昇麟遂計擒亂

首黃鎮等九人斬之又捕斬許章等二十六人縛獻
王寶等二十八人內外讐伏榮乃開城門延諸制府
大帥直指使者以次導從鼓吹入拊循城中城中人
皆歡呼動地曰微詹公我曹皆魚肉矣自變起至事
平凡五閱月焚掠無算獨榮所部錢穀儲胥秋毫莫
敢犯論功晉光祿寺少卿以艱歸除服補尚寶司卿
晉南京太常寺少卿隨擢僉都御史巡撫甘肅甘肅
地與諸番犬牙時肆侵掠榮宣布威德剿撫兼施境
內晏然魯迷貢使留甘州者九十餘人大帥楊信驅
以禦虜死者九人榮劾信夷以好來而用之鋒鏑傷

向化心且示虜弱非計也 詔奪信官厚恤死者檣

車送歸國夷皆悅服大同巡撫趙錦與帥周尚文不相能事多肘掣廷議榮故于大同有功宜徙榮大同
詔從之虜以數萬騎入榮與尚文禦之黑山斬五十餘級殺其一酋論功晉右副都御史賜金幣明年
虜復犯中路鐵裹門鵠鵠峪且將深入榮嚴兵遏虜衝而遣游騎四出邀擊斬獲甚多虜遁去榮又修邊
牆三十餘里爲堡七里爲墩臺一百五十四虜自是不敢窺大同 肅皇帝喜甚璽書褒之賜金幣晉俸
一級代宗充灼與其黨張文溥等謀爲亂使告虜若

來吾爲內應又遣人焚諸草場絕芻牧以困我師榮
偵獲之充灼等俱正法論功晉兵部右侍郎巡撫如
故當嘉靖時虜張甚其大酋帳直雲中日蹂躪塞下
人情皇皇而榮爲撫翁萬達爲督尚文爲帥相與戮
力戰守邊備大修虜入輒創去最後以數萬騎犯滴
水崖裨將董暘江翰與戰死之尚文遇虜曹家庄三
戰三克所斬虜過當擐其旗捷聞晉榮俸一級隨
召入以右侍郎攝曹事屬當防秋榮條上十策皆施
行隨轉左而榮病矣其卒爲嘉靖三十年年僅五十
二贈工部尚書

李充濁

附弟充拙

李充濁永平衛人父時官知府充濁孝友力學登嘉靖中進士知葉縣收黃山巨寇民咸德之徵爲禮科給事中屢上封事轉河南叅政修築隘口順德山西九百餘里按察陝西辨官家子五人積寃歷貴州布政使轉輸賑銅仁荒歉募民以備苗變疏歸於城北營萬柳庄結社鄉黨深德之弟充拙與充濁同掇鄉科知陳州州刁猾戀公門溷文檄以擾害鄉民久莫能去充拙下車訪首罪杖殺之餘衆悉逃散後知南通州政平訟理卒于官

趙得祐

趙得祐字元吉盧龍縣人曾祖忠由永樂甲子舉人任御史改刑部郎中致仕以行誼著聞祐三歲失恃稍長好讀書爲諸生隣人有加以橫逆者讀書自如人服其雅量登嘉靖癸未進士凡公服以布爲之當道有司皆重其敦雅甫三月選陝西道監察御史巡按應天掌南京畿道而嚴繙蘇松等府案牘上疏糾劾輔臣羣黨側目陞貴州僉事以去未幾以邊材調遼東巡海省築邊金費調山西兵備分巡冀南道轉貴州畢節道陞山東叅議而分守遼海東寧道陞陝

西副使備兵肅州其在貴州却金而服蠻夷及撫哈
密酒泉頌之陞陝西行太僕寺卿以丁內艱請致仕
歷任二十七年以清介終始焉林居泊然如書生時
仍下帷枕席皆典籍也薪粟之乏不問蓋其所好在
斯焉居第敝甚知府紀公以贖鍰置瓦甍于城局命
役守將爲葺聞而艷然曰得祐薄官時無敢取一介
恐虐地方赤子耳今顧累及桑梓耶樂引後輩而企
前修鄉族稱其孝友無間言應事接物坦如也壽七
十三卒至今稱官家不以財累者趙氏也

張世忠

張世忠字顯甫其先山東日照人宣德間祖俊由臨
洮衛鎮撫調衛始爲山海人俊三傳無嗣以猶子鳳
襲世忠其子也生而神爽志向不凡少長入衛學慕
詹公榮文藝就正之通兵法而兼文藝嘉靖丙戌中
會試武舉贊畫軍機於薊戊子襲祖職加武舉二級
授署指揮僉事撫臣薦管衛印編徭爲後法薦授提
調石門進守備黃花鎮革中璫歛役諸弊進署都指
揮右叅將分守大同中路振揚士氣虜不敢輕犯民
遠出耕穫復請加衛學廩糧科貢額頓加舊尋調應
援宣寧斬獲虜級二十九顆馬駝牛羊八百有奇夷

器二千五百餘陞實級資金幣續給誥命兼斬獲捷
奏大臣奏保因邊事回籍對簿旋以西寇棘兵部請
授偏頭叅將是時太原失利人措爲畏途世忠聞命
奮然曰正報國之秋也亟赴之虜寇太原矣世忠所
部軍士先期選策應止存千餘而統之與叅將劉維
琥大同副總兵段堂等從寧武關合營追賊軟血誓
相救援乃結隊自侯林西行追至祁縣六支村西遇
虜衆督率力戰虜見其軍士壯戰又力呼騎三千餘
合圍四將縮閉營世忠督戰益力賊亦窘會火藥已
盡世忠憤呼曰我軍被圍諸將背盟竟不相援國憲

天刑寧汝追耶復督短兵血戰自己至西賊見我兵死傷衆無援久戰力竭遂躡我營馬爲射死世忠頭中二矢又騎墻獨射被穿腋一箭而死家丁五人往救張臣及百戶張宣俱卽死而士馬亡過半矣嘉靖壬寅七月九日也事聞 賜祭葬用一品禮謚忠愍

王 鎬

王鎬字宗周灤州人也父璋爲義烏丞母李氏感異夢而生長七尺如神英姿比玉家世故殖爲友人周冉之難以貧值侵歲自啗糠粃而以粟事母嘉靖壬午舉于鄉嚴嵩爲司業欲收之門下不顧己丑成進

士校大理寺評事廷尉雅重之疑獄必屬焉京師有
惡少誘宦家子淫博失千金廷正欲重惡少罪鎬舉
古人言曰凡居官廉雖大臣無厚積其厚積必貪婪
致之如子孫善守是天福不道之家不如恣歸于人
廷正善其言而止居二年改山西道御史首言追崇
之禮出自 聖孝議禮諸臣不過將順而已何敢貪
天功以徼榮自私當時中外臣僚羣起攻之未必無
所見何至廢退者未起禁錮者不釋哉疏上人爲傍
懼而不恤也初按江西典試事所舉皆知名士分考
官呈中夏相婿鎬曰寧得罪于一家不得罪于多士

竟黜之而相亦不銜世兩賢其人再按河南諭其屬
曰當興不興者爲善人遺害也當革不革者爲惡人
殖利也下令蠲贖鍰出餘帑大築黃河堤連護十城
全腴田萬頃境內人材不通姓名舉之而鼓勢行私
者抑焉京營冒鉅萬計姦利不可勝數而提督臣爲
宰執肺腑親人莫敢問鎬巡視之輒奏去甚者宰執
銜之出爲山西副使兵備代州邊有警而代當衝鎬
禦免虜患而銜者已媒孽其間左遷湖廣叅議提督
太和山至則督發中貴人贓幣人以天神目之轉山
東山西副使甘肅行太僕寺卿兼攝四道戎馬貨胡

馬八百威武大揚轉山東右叅政駐節萊州府卻美
金四千兩轉湖廣按察使禁戢宗室爲暴者數人王
以書來好答使者去已卽投櫝中封之或於法得釋
使來謝乃引使至櫝取書還之實未發爲報曰法當
如是而吾安敢低昂耶後書不更來至於祿糧調停
咸足尋轉右布政值左轄缺攝事諭諸解銀者入則
所司緘封進出則原緘發之惟據案端坐懸衡謹機
錙銖無所移莞庫不得與是時倭寇猖獗爲繕城池
備守具給餽餉檄土著子弟往出奇設伏左右翼擊
殲之沉大艚數十擒斬俘獲無一東還者諭功當超

遷一級廕子忌者沮之止賞銀幣轉右僉都御史巡撫寧夏入境輒有斬獲會楊襄毅公初入吏部首推薦欲擢貳司馬相子世蕃大恚嗾給事中某論之召回京別用旣入京遇嚴相長揖而已遂乞骸骨歸與兄同居貴不置私橐親猶子如已出終世未嘗一言干有司遇親舊有婚喪者輒助之而佐士之貧者時交薦無虛歲以年至而堅卧矣隆慶戊辰不疾而卒萬曆改元覈邊功賜銀五十兩

厲汝進

厲汝進字子修灤州人生岐嶷若玉垂髫補弟子員

而苦學博覽尤長于史記先達高京兆王中丞皆虛心接引之貧爲里中師名士多出其門束脩一錢不私侍父疾湯藥三月餘疾愈方還帷室嘉靖甲午舉於鄉或有出百金助息者謝曰書中自有之不願聞命矣戊戌成進士授池州府推官束帶坐堂判十年疑獄者七撫按賢之凡諸郡大獄皆質成道路有神明之頌辛丑徵拜戶科給事中歷轉都掌科論柄相疏指嵩爲國大毒于世蕃弄權納賄其勢方張董牛之牯宜禁于始疏上嵩黨黃璫者御前給之曰當大雩齋戒時何得又來救楊杲上大震怒不及覽命

廷杖八十謫雲南亦佐縣典史慨然曰生卽懸蓬弧
長何計秦越卽日就道次年竟以考察罷例不復錄
楊忠愍繼盛疏云嵩考察外官時逼嚇吏部將汝進
罷黜夫言官縱言不當旣降之爲典史則無過可指
也乃以私怨罷黜之則外臣被中者又何可勝數耶
曩在池州建德徐紳爲諸生以事逮繫汝進奇其才
特釋之後紳舉進士至都御史巡撫順天而稱門下
士人咸服其識鑒直聲遠震外夷高麗使入貢時問
曰厲給事安否其名重如此居鄉二十餘年徜徉泉
石詩酒自娛好誼樂施濟貧赴急不計勞之輕重曩

之有無也隆慶踐祚方復原官秋尋以疾卒訃聞京師朝士大夫罔不咨嗟曰正人未究其用世可無斯人哉年五十有九

韓梅

韓梅永平衛人以文行著名領鄉薦任大同府同知六年廉平多惠政士民永懷有驛丞范姓者歿於官妻子流落鬻女爲婢梅捐俸贖歸其母當邊事孔棘而轉輸調度得宜總督翁萬達器之薦欲大用而邁疾歸居家惇倫任質鄉黨稱之

李涵

李涵遷安人按察副使金之子孝事孀母以田產讓弟嘉靖間登進士爲戶部郎督兌運尚書稱爲廉吏知延安府除水患賑饑民兵備肅州修嘉峪城事竣賜金幣旌功軍民勒石紀其事補貴州兵備雪冤理枉民有天星之謠轉左布政擒首惡龍許保等苗民率服

周 冉

周冉灤州人少貧傭書養親爲諸生時上巡撫條議一曰兵失於遙制二曰糧失於漕運三曰田失於屯種四曰虜失於撫賞切中時務登嘉靖進士坊銀遍

散親識貧乏者出使遼東雪中却軍官貂裘之饋歷漢陽知府卒不能歛賻金葬之

王好學

王好學灤州人領嘉靖庚子鄉薦令陳留蠲逋修學及判澤州佐歸德多善政及補太原弭盜祥刑請治宗室驕橫檄撫石州爲畫戰守之策爲戶部郎督餉有執陞楚雄知府懇疏乞歸助城守火器償被誣者筦金訓同宗恤母族與弟司徒好問媿美焉著有遊藝集

王好問

王好問灤州人知府好學之弟生有異兆弱冠抱嘗
世志嘉靖間登進士授太常博士擢御史卽劾巨璫
不法事出按秦晉上興革便宜却諸祥瑞不以聞
穆宗朝益多獻替而重孝思止行幸查內庫諸疏并
劾近習謀典兵柄尤極剴切遷大理寺歷官戶部尚
書憂時思職無少替南中米湧貴先發倉粟而後以
聞有古大臣風先是爲卿貳卽抗疏求退至是章屢
上始得允歸數月卒賜祭葬贈太子少保立朝恭謹
動循矩矱謙抑若不勝衣而內寔不可奪鄉誼族範
遐邇共孚所著有春煦軒集

盧耿麟

盧耿麟灤州人嘉靖間以弱冠登進士官工部郎議
節浮冗轉江西僉憲多洗沉寃駐大同當叛逆甫定
戢以恩威虜入監兵有運籌功督修五堡巨鎮賴以
永安世廟褒之卒家無餘貲性直方敦孝友父產悉
讓二弟所居庭前無旋馬地博極羣書著有藍山集

劉復禮

劉復禮山海衛人嘉靖中領鄉薦宅心坦夷裋躬謹
飭歷官陝右同卿兼憲銜二紀餘致政歸服食居處
澹然如儒生桑麻外無厚產幼以孝聞迨暮年尚與

季弟同爨每舉箸必呼弟儻它往必輟不食有脩鄰者相與質成愧服平生清而儉簡而有禮可匹古人

王大用

王大用東勝左衛人登隆慶進士授扶溝知縣執法無所阿避當路銜之左遷東平州判陞滕縣令明習吏事每事必探弊端一大璫進貢折辱驛官吏大用詣郵亭令開篋驗之皆胖襖遣人收捕其解戶於獄大璫甚懼求免其練明肩事類如此陞大理寺評事改戶部郎中歷官遼東陝西叅政兩縣并祀之

劉文煥

劉文煥字世英樂亭縣省祭官素行端樸爲吏無過父早逝事母王氏孝妻盧氏又孝姑疾焚香祝天誓冬着單衣者三年疾果愈姑歿願爲廬墓文煥曰廬墓此爲子事也葬母後卽廬墓所哀毀骨立每日舉土三次墳可望數里嘗鑿井墓傍汲以自爨不數尺泉水湧出始苦忽甘人以爲孝感號其井曰孝子泉署縣事推官沈之唵獎之給米而至其廬聞其言劬勞罔極抱蓼莪之戚乃思歸而侍親文煥喪畢命知縣迎之路沈選給事中不赴任而告病歸養蓋不負文煥所感也

楊騰

楊騰遷安增廣生也廬母吳氏墓有冰花結於盆絲
文秀異儼如樹下人拜伏墳前之象已芝草生焉隆
慶元年親以老疾告終哀毀踰禮幾于滅性旣葬居
廬咸如初喪三年七月地產靈芝大小四枝黃紫二
色廬左右成列若植孝行感格事應異常縣以聞于
上官立純孝格天華表于通衢仍給冠帶人丁榮其
身復其家云

補遺

麴祥

麴祥字景德其先永平人永樂初侍父百戶亮調任
金山年十四爲島夷所虜轉商日本其王召見之留
侍左右改名元貴因得力學遂爲土官蓄妻子然心
未嘗一日忘中國也屢諷王入貢宣德中與使臣抵
京上疏陳情臣夙遭虜抱釁痛心死生路梗流離困
頓辛苦萬狀生還中國夫豈由人伏乞歸省侍上
意在柔遠不欲遲留之遣令還國許給驛暫詣金山
獨其母存耳母曰果吾兒則耳陰有赤痣驗之信然
抱持慟哭悲動隣里未幾重違上命別去祥至日
本啓以聖意仍令人貢申前請詔許襲職歸養

祥母子相失二十載又有華夷之限得遂其養亦天幸矣

萬信

萬信直隸昌黎人宣德中知開封守職廉勤夜夢一男子裸身稱冤曰某爲祥符縣民耿陽兒所殺屍埋庄後信驚寤明日至其家果得屍考驗俱服人皆異之在任歲久一夕澡畢燃燭廳事呼酒獨酌召二子曰強毅可建事功忠孝可通神明我去汝勉爲之言訖遂逝

李采菲

李采非字君采號臨江昌黎縣人嘉靖乙丑進士由
行人選授四川道御史兩巡川廣所至以風裁稱尋
掌河南道大計外吏汰斥惟精累官至右副都御史
巡撫山西采非自行太僕卿以至藩司臬長咸在晉
地故于閭里疾苦長吏賢不肖邊關阨塞夷情向背
如燭照數計諸所措注悉當機宜先是礦徒張守清
聚衆豪里中恐其久而獷悍也編其衆而什伍之會
大璫祀五臺者有所要求意弗饜歸爲上言守清
作奸狀竟以縱寇殃民詔歸歸數年而卒